

# Maombi Yenye Matokeo



## SABATO MCHANA

**Somo la Juma Hili:** *1Fal. 19:1-18; Mt. 6:5-8; Lk. 11:2-4; Mt. 6:5-15; Dan. 9:4-19; Rum. 8:26,27.*

**Fungu la Kukariri:** Enyi watu mtumainini siku zote, ifunueni mioyo yenu mbele zake, Mungu ndiye kimbilio letu” (*Zab. 62:8*).

**J**e, maisha yako ya maombi yakoje? Unaomba mara nyingi kiasi gani? Ni kwa bidii kiasi gani? Ni kwa matarajio kiasi gani? Je, unaomba kila siku, au unaomba wakati wa dharura tu? Je, maombi yako daima ni kwa ajili ya mahitaji ya kitu fulani, au huwa unamsifu Mungu katika maombi yako, pia?

Pia, huwa unaomba asubuhi kabla ya kula na huenda katikati ya siku yako yenye shughuli nyingi? Huenda umekuwa sehemu ya kikundi fulani kinachoomba mara kwa mara au hata umepata uzoefu wa kile kiitwacho kuomba bila kukoma (saa 24). Je, umepata uzoefu wa nguvu na kuwepo kwa Mungu kupitia maombi ambayo yanabadilisha kila kitu katika maisha yako?

Maombi ni muunganiko wa daima kati yetu (matawi) na Yesu (Mzabibu). “Ili tuweze kukua na kustawi, lazima daima tufyonze utomvu na viinilishe kutoka kwa Mzabibu Hai; kwani tukijitenga na Mzabibu tunakosa nguvu” -Ellen G. White, *Early Writings*, uk. 73. Huu ndio mbaraka wa maombi ya daima. Mungu hutusikia, na daima anajibu kwa wakati Wake na kwa jinsi Yake ifaayo – ingawa si kila wakati itakuwa kama tulivyotarajia.

Juma hili hebu tujifunze waombaji wengine katika Biblia na kuangalia njia halisi za kuimarisha maombi katika maisha yetu ya kila siku.

*\*Jifunze somo la juma hili katika maandalizi kwa ajili ya Sabato, Mei 16.*

## Eliya – Kuomba katika Zahama

Eliya aliyekuwa mwaminifu aliishi zama za uovu, wakati mfalme Ahabu akazidi “kumghadhibisha BWANA, Mungu wa Israeli, kuliko wafalme wote wa Israeli waliomtangulia” (1 Fal. 16:33). Wakati wa ajabu kupita zingine zote katika maisha ya Eliya ulikuwa wa makabiliano katika Mlima Karmeli (taz. 1 Fal. 18). Katika kilele cha kisa hiki cha kustaaajabisha, Ahabu na ufalme wake waliona kwa macho yao wenyewe ukweli kwamba Mungu hujibu maombi. Huu ulikuwa wasaa usioweza kusahaulika katika historia ya Waisraeli na ndio maana badiliko la ghafla la matukio katika kisa hiki yanatustaaajabisha.

**Soma** 1 Fal. 19:1-18, mahsusi ukizingatia maombi ya Eliya na mazungumzo kati yake na Mungu. Ni nini hasa kinachomsababishia Eliya sononeko hapa? Je, mwitiko wa Mungu unatofautianaje na kile kilichotokea katika Mlima Karmeli?

Ndani ya siku moja, ingawa Mungu alijibu kila moja ya maombi ya Eliya, hali ya kihisia, kiakili na kimwili ya Nabii ilibadilika mara. Ingawa Eliya alikuwa amepata uzoefu wa ushindi mkuu pamoja na Mungu siku ile, alikuwa, katika saa ya uchovu ameruhusu hofu ya kifo kuishinda imani yake kwa Mungu. Kinachoshangaza zaidi juu ya kisa hiki ni kwamba ingawa Eliya alijisalimisha katika kukata tamaa na kuvunjika moyo, Mungu alimjia kwa huruma na upole, akimpatia chakula na maji tena (1 Fal. 19:5,6) – kiasi kwamba alikaa bila kula tena kwa siku 40 usiku na mchana (1 Fal. 19:8). Na wakati ambapo hatimaye Mungu Alijifunua, ilikuwa kwa namna tofauti kabisa na hapo kabla.

Nyakati zingine katika maisha yetu, Mungu hujibu kwa namna ya moja kwa moja, yenye nguvu, na isizopingika. Hii huimarisha imani yetu, nasi tunahisi ukaribu wa Mungu katika maisha yetu.

Nyakati zingine tunayumba na kujisalimisha katika majaribu, tukidhani kwamba ni jambo gumu mno kumfuata Mungu kwa imani isiyoyumba. Tunatafuta majibu ya Mungu kwa njia tunazomtarajia ajibu, bila kutambua kwamba njia Zake na mawazo Yake ni ya juu mno na ya hekima mno kuliko vyetu (Isaya 55:8,9). Kama ambavyo kuna mengi kuhusiana na uumbaji wa Mungu tusiyoyajua, tusishangae kwamba kuna mengi kuhusiana na njia za Mungu ambayo hatuyajui pia.

Mungu, Baba yetu mwema na mwenye rehema, anajua fika kile unachohitaji. Unaweza je kutulia kiasi cha kutosha kumtumaini na kudumu kumtazama katika mazingira yote? Zungumza Naye juu ya jambo hili sasa hivi.



## Maombi Yanapoonekana Kutojibiwa

Huenda umeomba juu ya kitu fulani kwa muda mrefu, bila shaka hata mwaka, na inaonekana kana kwamba Mungu hajasikia maombi yako. Biblia inasema “ombeni nanyi mtapewa” (*Mt. 7:7*), “tukiomba kitu sawasawa na mapenzi Yake” (*1 Yoh. 5:14*). Unazielewaje ahadi hizi.

Hana ni kielelezo cha mwanamke mcha Mungu ambaye aliomba kitu mahususi (*1 Sam. 1:10-17*). Mwanzoni ilionekana kwamba Mungu hakujibu maombi yake, lakini alidumu kuomba, na Mungu alijibu, katika muda Wake mwafaka na kwa kadiri ya mapenzi Yake. Nyakati zingine kungoja kunaimarisha kutembea kwetu na Mungu, kadiri tunavyojifunza kumtumaini zaidi.

Zaburi 62:8 “Enyi watu mtumainini siku zote, ifunueni mioyo yenu mbele zake, Mungu ndiye kimbilio letu.” Tumaini. Je, tunaamini kwamba kwa kweli anajua kilicho bora, hata wakati tunaposhindwa kuona jibu la mara moja kwa maombi yetu? Je, tunaamini kuwa hatimaye Atajibu katika muda na njia mwafaka Kwake?

Nyakati zingine yawezekana maombi yetu yasiyijibiwe haraka kama tunavyotaka au kwa namna tunayotumaini kuwa yatajibiwa. Je, Biblia inatupatia ushauri gani juu ya jambo hili?

- Tafuta mapenzi ya Mungu, na wala si mapenzi yako (*Mt. 6:10; 1 Yoh. 5:14, 15*).
- Chunguza msukumo wako wa kuomba (*Mit. 16:2, Yak. 4:3*).
- Tafakari iwapo unayodhambi unayoipenda (*Zab. 66:18, 1 Pet. 3:12, Mit. 15:29*).
- Kaa ndani ya Mungu na ndani ya Neno Lake (*Yohana 15:5*).
- Unapoomba amini (*Ebr. 11:6, Yak. 1:6, Mk. 11:24, Mt. 21:22*).
- Chunguza hali ya moyo wako (mnyenyekevu au mwenye kiburi) (*Yak. 4:6, 1 Pet. 5:6*).
- Vumilia (*1 The. 5:17, 18*).
- Wasamehe wengine (*Marko 11:25, 26*).
- Hatimaye, Mungu anaona picha pana na anajua kilichobora kwa ajili yetu (*Rum. 8:28; Efe. 3:20, Yer. 29:11-13*). Nyakati zingine jibu Lake ni kama Alilompa Paulo “Neema Yangu yakutosha” (*2 Kor. 12:9*).

Ukweli muhimu unaongoza mwitiko wetu kwa kile kinachoonekana kama maombi yasiyojibiwa ni jinsi tunavyomwelewa Mungu. Kama tunamwona Mungu kama aliye mbali na asiyejali, uhusiano wetu Naye unadorora. Katika nyakati kama hizo, chunguza Biblia ili upate ushahidi wa upendo na uangalizi Wake kwako na uombe kwamba uelewa wako juu Yake ulipotoka utarekebika.

## Yesu Anatufundisha Jinsi ya Kuomba

Katika wakati wa Yesu, maombi yaliyokuwa marefu na yaliyoandaliwa kitaalamu kama utendaji – kwa kutumia maneno magumu na mara nyingi yaliyokaririwa- yalithaminiwa sana. Yesu hakuona lolote zuri la kuzungumza juu ya maombi haya (*taz. Mt. 6:5-8*). Aliyafunua kuwa kile walichokuwa: maonesho ya “utakatifu” wa kujifanya.

Wanafunzi walimwona Yesu akiomba, na walijua kuwa maombi yalikuwa sehemu muhimu sana ya maisha Yake (*taz. Luka 5:16, Luka 6:12, Luka 9:18, Luka 22:41, Luka 24:30, Marko 1:35, Marko 6:46*). Walipomtazama Yesu, waliona tofauti na viongozi wa dini na kutambua kuwa kulikuwa na mengi zaidi kuhusiana na maombi kuliko walichokuwa wakikizingatia. Hivyo, wanafunzi wakamjia Yesu, na kumwomba, “Bwana, tufundishe sisi kusali” (*Luka 11:1*).

Yesu alionesha kielelezo kwa wanafunzi Wake (na kwetu) kwamba tunaweza kuomba tu kwa lugha ya kawaida. Alituaonesha kuwa maombi yetu yanapaswa kuwa ya dhati na kutoka moyoni mwetu.

Soma Luka 11: 2-4 na Mathayo 6:5-15 na uone vipengele vifuatavyo vya maombi ambavyo Yesu alifundisha:

- **Baba yetu uliye mbinguni:** Kutambua uhusiano wako binafsi na Baba wa wote.
- **Jina Lako litukuzwe:** Kutambua utakatifu wa Mungu hutusaidia kuja kwa kicho na heshima.
- **Ufalme Wako uje:** Kuwa na shauku ya ujio wa Mungu na ukaaji ndani yetu wa Roho Mtakatifu hadi atakapokuja.
- **Mapenzi yako yatimizwe hapa dunia kama huko mbinguni:** Kujisalimisha na kuomba kwamba mapenzi ya Mungu yatimizwe maishani mwetu, tukitumaini kuwa anajua kilicho bora, badala ya kuomba tu kwa ajili ya kile tutakacho.
- **Utupe leo riziki zetu:** Kuomba kwa ajili ya kile tunachohitaji ili kuishi, kwa aina zote mbili yaani kimwili (chakula na maji) na kiroho (Yesu na Neno Lake lililo hai).
- **Utusamehe deni zetu kama sisi nasi tuwasamehevyo wadeni wetu:** kutubu, kutafuta msamaha, na kukumbuka kuwa huru kuwasamehe wale ambao wametuumiza kama anavyotusamehe Mungu.
- **Usitutie majaribuni bali utuokoe na yule mwovu:** Kuomba kwa ajili ya ulinzi na kimbilio dhidi ya uovu katika ulimwengu huu (*Zaburi 91*).
- **Kwa kuwa ufalme ni Wako, na nguvu, na utukufu, hata milele.** Amina: Kutambua kuwa vile tulivyo, vile tulivyo navyo, na vyote tufanyavyo ni vya Mungu. Ni Yeye pekee astahiliye utukufu na sifa zetu (*1 Nya. 29:11*)

Kwa nini usiombe zaidi na kumgeuzia Mungu uso wako kila asubuhi kuzungumza na Yule akupendaye kuliko mwingineyo? Ni kitu gani kinakuzuia kufanya kama ujuavyo kuwa unapaswa kufanya? Omba sasa hivi kama ambavyo Yesu ametutaka kufanya.



## Kusifu, Ungamo, Mahitaji, Kushukuru

Kwa jinsi ile ile ambayo Yesu alitufundisha kusali katika Mathayo 6:5-15, tunaweza kufuata kielelezo hiki rahisi tunapokuja kwa Mungu kwa faragha, pamoja na familia zetu au kama kanisa, tukikumbuka kuwa maombi ni kuzungumza na Mungu kama kuzungumza na rafiki. Mara nyingi maombi yetu yamejaa haja zetu ingawa Yesu ametufundisha kuomba kwa ajili ya mengi zaidi ya hayo.

**Soma** ombi la Danieli katika Danieli 9:4-19 kisha ubainishe vipengele tofauti vya ombi lake.

Zingatia jinsi unavyoweza kujumuisha vipengele vifuatavyo katika maombi yako:

**Kusifu:** ni kuonesha sifa na ibada kwa sababu ya Yeye ni nani na vile alivyo. Soma Zaburi 100, wimbo mzuri wa sifa kwa Mungu. Angalia majina mengi ya Mungu, na tabia Yake iliyotukuka. Msifu kwa kuwa Mkombozi, Mwokozi, Mfariji, Mponyaji, Mchungaji Mwema, Alfa na Omega na Mwamba, hivi ni vichache kati ya vingi.

**Ungamo na Msamaha:** Tunapojikuta tukiongea na Mungu na kukaa ndani Yake, ni lazima tu tutaachilia chochote kinachotuzuia au kututenga Naye. Kadiri tunavyokuwa karibu zaidi Naye, ndivyo tunavyozidi kuona kutostahili kwetu na umaskini wetu. Hii inatufanye tumsihi Aondoe dhambi zetu na kuitengeneza tabia yetu ili ifanane Naye. Ikiwa tunataka Mungu atusamehe, ni lazima tuwe tayari kuwasamehe wengine pia. "Ungameni dhambi zenu ninyi kwa ninyi, na kuombeana, mpate kuponywa. Kuomba kwake mwenye haki kwafaa sana, akiomba kwa bidii" (Yak. 5:16).

**Mahitaji:** Ni changamoto gani unakabiliana nazo, bila shaka na familia yako, marafiki, afya, fedha, kazi, au masomo? Ni wapi hasa unahitaji mkono wa Mungu ukuongoze? Ni nani anahitaji msaada wako, na ni kwa njia zipi bora unaweza kuutoa? Omba mahususi kwa ajili ya maeneo hayo na watu ukiomba mapenzi ya Mungu yatimizwe.

**Kushukuru:** Soma Wafilipi 4:6 kisha utafakari juu ya mibaraka ya Mungu maishani mwako. Utaweza kukumbuka vitu muhimu, lakini vipi kuhusu vitu vidogo ambavyo mara nyingi hatuvizingatii? Sisi ni wapokeaji wa daima wa rehema za Mungu; na bado ni shukrani kidogo kiasi gani huwa tunatoa, ni kiasi kidogo sana tunamsifu kwa ajili ya kile alichotutendea.

Ni vitu gani unataka kumsifu Mungu kwavyo, kuungama Kwake, kuomba kutoka Kwake na kumshukuru kwavyo? Kwa nini usifanye hivyo sasa?

## Maswali Mengine Kuhusiana na Maombi

Kwa nini umbe wakati tayari Mungu anajua? Kwa nini tuombe wakati ambapo Mungu Yuajaa yote? Ellen G. White anafafanua hivi: "Si lazima kufanya hivyo ili kumjulisha Mungu hali yetu ilivyo, bali kuongea naye kunatuwezesha kumpokea mioyoni mwetu. Sala hazimlazimishi Mungu kushuka kwetu, bali ni sisi ambao tunainuliwa mpaka kufika kwake." - *Jipatie Amani Moyoni*, uk. 70. Kwa hakika Mungu anajua shauku zetu na mahitaji yetu, na anasoma kila kusudi la mioyo yetu. Lakini kuomba ni kitu chema kwetu. Maombi yanatualika kukoma katikati ya pilikapilika katika maisha yetu, kutulia na kutambua kwamba Mungu ndiye mtawala wa vyote na kujiweka miguuni Pake. Njia pia zaweza kufunguliwa kwa ajili ya Mungu kutenda ikiwa tutamwalika kufanya hivyo. Roho Mtakatifu hutuomba wakati ambapo hatujui namna ya kuomba tupaswavyo (*Rum. 8:26, 27*).

Kwa nini umbe wakati yote ni salama? Kujitosheleza na kiburi (*taz. Somo la 3*) vinaweza kuwa miongoni mwa vikwazo vikubwa kabisa kwa maisha ya maombi thabiti. Ikiwa tu tungetambua ni kiasi gani tunamhitaji Mungu, tungemjia mara nyingi zaidi! Ikiwa malaika wakamilifu wanamsifu na kumwabudu, kwa nini sisi, tulio wanadamu wenye dhambi, rudhani kwamba si wahitaji sana wa maombi? Je Mathayo 5:6 na Isaya 44:3 zinasema nini juu ya ukweli huu?

Imani ina sehemu gani katika maombi? Soma Waebrania 11:6 kisha utafakari maneno haya: "Maombi na imani vimeshikamana kwa karibu sana, navyo vinapaswa kujifunzwa pamoja. Katika ombi la imani kuna sayansi ya kimbangu; ni sayansi ambayo kila anayetaka kufaulu maishani lazima aielewe. Kristo anasema, "Yo yote myaombayo mkisali, aminini ya kwamba mnayapokea, nayo yatakuwa yenu" Marko 11:24. Anaweka wazi kuwa kuomba kwetu lazima kuambatane na mapenzi ya Mungu; ni lazima tuombe mambo yale aliyohidi na tukipokea tutumie kufanya mapenzi Yake. Masharti hayo yakitimizwa, ahadi haina mashaka... Hatuna haja ya kutafuta uthibitisho wa nje wa baraka Zake. Ellen G. White, *Elimu ya Kweli*, uk. 210.

Niombe na Nani? Muda mwingi zaidi tunapaswa kuomba wenyewe (Mungu na wewe tu), kwa vile maombi na kujifunza Biblia ni kama damu ya uhusiano wako na Mungu. Tenga muda wa kuuchunguza moyo wako wakati ukizungumza na kumsikiliza Mungu (*Mt. 6:6*). Tunapaswa pia kuomba na familia zetu au katika vikundi vidogo (*Mdo. 12:12*), maana wakusanyikapo wawili au watatu kwa jina la Bwana Mungu yupo hapo (*Mt. 18:20*). Mwisho, tunapaswa kuomba na jumia zetu za kanisa (*Yak. 5:13-16*). Maombi ya aina zote tatu ni ya muhimu.

Nisikilizeje? Maombi ni zaidi tu ya kuzungumza na Mungu; tunapaswa pia kumruhusu "atupogoe" na kuzungumza juu ya maisha yetu. Njia bayana kabisa na salama ya kulifanya hili ni kwa kusoma Biblia na kuunganisha maombi na usomaji wa Biblia katika wakati wako wa ibada. Uwe mwangalifu usije ukawa unasikiliza mawazo yako tu badala ya kuchunguza Biblia.

Ni kitu gani kinaonekana changamoto sana kwako katika hoja hizo hapo juu?



**Jifunze Zaidi:** “Kama tungezidi kumfikiria Yesu na kuongea juu Yake, na kutojifikiria sana nafsi zetu, Yesu angezidi kuwapo pamoja nasi.” Ellen G. White, *Jipatie Amani Moyoni*, uk. 77.

“Tukifanya mashauri na hofu na mashaka yetuau kujaribu kutatua kila kitu ambacho hatukioni kwa udhahiri wake, kabla hatujawa na imani mashaka yataongezeka na kuwa ya kina. Iwapo tunakuja kwa Mungu, kama tulivyo, tukihihi kukosa msaada na tukiwa tegemezina kwa unyenyekevu tukiwa na imani tunamfahamisha mahitaji yetu Yeye aliye na maarifa yasiyo na ukomo, Yeye aonaye kila kitu katika uumbaji, Yeye aongozaye kila kitu kwa utashi Wake na neno Lake. Yeye ana uweza na atashughulikia kilio chetu na ataruhusu nuru ing’ae katika mioyo yetu.” Ellen G. White, *Jipatie Amani Moyoni*, uk. 73.

“Moyo waweza kupaa karibu kabisa na mbingu katika mbawa za sifa. Huko mbinguni Mungu husujudiwa kwa nyimbo na shangwe. Nasi tunapomtolea Mungu shukrani yetu, tunamtukuza kama vile anavyotukuzwa na majeshi ya mbinguni, “Atoaye dhabihu za kushukuru, ndiye anayenitukuza. “Zabari 50:23. Hivyo tufike mbele Zake “kwa kushukuru na sauti ya kuimba.” Isaya 51:3.” Ellen G. White, *Jipatie Amani Moyoni*, uk. 78.

## Maswali ya Kujadili:

- ① Ni dhana ipi katika dondoo zilizo hapo juu inakutia shime zaidi? Ni ipi inakupa changamoto zaidi?
- ② Ni masomo gani mengine tunaweza kujifunza kutoka katika maisha ya maombi ya watu wengine katika Biblia? (*taz. Ezra 10:1; 2 Fal. 13:4; Yon. 4:2, 3; Hab. 3:1; 2 Fal. 19:14–19; Yer. 32:16–25; Neh. 1:4–11; 1 Fal. 8:22–54; tukitaja baadhi.*)
- ③ Kufunga kuna sehemu gani sambamba na maombi?
- ④ Je, kuna chochote kipya ambacho ungependa kubadilisha au kukitekeleza katika maisha yako ya maombi kama matokeo ya somo la juma hili? Kwa nini usifanye mabadiliko hayo?

**Muhtasari:** Biblia inatoa simulizi za maisha ya watu ambao walikuwa na maisha murua ya maombi ya daima na wengine ambao hawakuwa hivyo. Kadiri tunavyochungua kurasa zake, daima tutapata mtu ambaye tutajihusianisha naye, bila kujali hali ya uhusiano wetu na Mungu. Pia tutapata ahadi nyingi, nyingi kabisa ambazo zitatutia moyo na kutuongoza katika maisha ya ibada. Kukua kiroho kunapaswa kuwa lengo letu- macho yetu yakiwa yamekazwa kwa Yesu, kielelezo chetu kikuu katika vitu vyote, na mwanzilishi na mkamilishaji wa imani yetu.